

甘肅府縣志輯

中華書局影印

光緒重修皋蘭縣志(三)  
乾隆平番縣志

# 中國地方志集成

甘肅府縣志輯 ⑤

光緒重修皋蘭縣志(三)

乾隆平番縣志

鳳凰出版社 ● 上海書店 ● 巴蜀書社



光緒重修皋蘭縣志(三)



(清)張國常纂修

重修皋蘭縣志卷二十二

列傳卷二 人物上

漢

馮忠金城人漢末金城陽成遠殺太守以叛忠赴尸號哭嘔血而死晉惠帝時張軌為涼州刺史祭其墓旌其子孫

晉書張軌傳

三國

成公英金城人漢中平末隨韓遂為腹心建安中遂從華陰敗走還湟中部黨散去唯英獨從遂壻閻行欲殺遂以降遂謂英曰今親戚離叛人眾轉少吾年老矣子欲何施英曰曹公不能遠來獨夏侯爾且息肩於羌中招呼故人綏會羌胡猶可以有

為也遂從其計會遂死英降太祖太祖見英甚喜以為軍師封  
列侯從行出獵有三鹿走過前命英射之三發皆應弦而倒太  
祖抵掌謂之曰但韓文約可為盡節而孤獨不可乎英下馬跪  
曰不欺明公假使英本主人在實不來在此也遂流涕哽噎太  
祖嘉其敦舊親敬之延康黃初之際河西有逆謀詔遣英佐張  
既平隴右既夜藏精卒三千人為伏使英督千餘騎挑戰敕使  
陽退胡果爭奔之因發伏截其後首尾進擊大破之行亦金城  
人後名豔字彥明少有健名始為小將隨韓遂建安初遂與馬  
騰相攻擊騰子超亦號為健行嘗刺超矛折因以折矛擣超項  
幾殺之十四年遂使詣太祖太祖厚遇之表拜捷為太守行因

請令其父入宿衛馬超反謀舉遂為都督行諫遂不欲令與超  
合太祖聞行意故但誅遂子孫在京師者遂聞行父獨在欲使  
并遇害以一其心乃強以少女妻行行不獲已太祖果疑行會  
遂使行別領西平郡因勒其部曲與遂相攻擊不勝乃將家人  
東詣太祖太祖表拜列侯

三國志張  
既傳注

晉

郭冲金城人晉初扶風王駿鎮關中司馬高平劉寶長史滎陽  
桓熙諸官屬士大夫共論諸葛亮於時談者多譏亮託身非所  
勞困蜀民力小謀大不能度德量力冲以為亮權智英略有踰  
管晏功業未濟論者惑焉條亮五事隱沒不聞於世者寶等亦

不能復難扶風王慨然善冲之言

三國志諸葛亮傳注

魏允金城人與游氏世為豪族西州為之語曰魏與游牛羊不數頭南開朱門北望青樓洛陽傾覆閭鼎等立秦王為皇太子於長安允為安夷護軍始平太守愍帝即尊位以允為尚書左僕射領軍持節西戎校尉錄尚書事時劉曜殷凱趙染數萬眾逼長安允擊破之擒凱於陣曜攻北地允為大都督驃騎將軍次青白城以救之曜聞而轉寇上郡允軍於靈武以兵弱不敢進復攻北地太守魏昌遣使求救允率步騎赴之去城數十里羣賊繞城放火煙塵蔽天縱反間詐允曰郡城已陷焚燒向盡無及矣允信之眾懼而潰後數日魏昌突圍赴長安北地遂陷

允性仁厚無威斷吳皮王隱之徒無賴凶人皆加重爵新平太守竺恢始平太守楊像扶風太守竺爽安定太守焦嵩皆征鎮杖節加侍中常侍村塢主帥小者猶加銀青將軍之號欲以撫結衆心然諸將驕恣恩不及下人情頗離羌胡因此跋扈關中淆亂劉曜復攻長安百姓饑甚死者大半久之城中窘逼帝將出降歎曰誤我事者魏索二公也帝至平陽為劉聰所幽辱允伏地號哭不能起聰大怒幽之於獄允發憤自殺聰嘉其忠烈贈車騎將軍諡節愍侯

晉書忠義傳

邊熙金城人仕後秦姚興為兵部郎上陳軍令頗苛宜遵簡約興覽而善之

晉書載記



騫苞金城人為吐谷渾博士視羆嘗從容謂苞曰易云動靜有常剛柔斷矣今將秣馬厲兵爭衡中國先生以為何如苞曰大王之言高世之略秦隴英豪所願聞也於是虛襟撫納衆赴如

歸

晉書吐谷渾傳

南北朝

邊榮金城人宋荆襄都督沈攸之舉兵討蕭道成以榮為留府司馬守城張敬兒之襲江陵也城潰見執敬兒曰邊公何為同人作賊榮曰沈荊州舉義匡社稷不可謂賊身本不求生何須見問敬兒曰死何難命斬之榮歡笑而去榮容泰山程邕之抱持榮顧謂敬兒曰君入人國不聞仁惠之聲而先戮義士三楚

之人甯蹈江漢死耳豈肯與君同日而生敬兒曰求死甚易乃

先殺邕之而後及榮軍士皆為垂涕

南史沈攸之傳  
兼採通鑑輯覽

案宋書州郡志金城郡縣自晉安帝以來寄治漢中南鄭然  
宋書及北史沈攸之傳但稱榮為金城人不言其僑寓南鄭  
故依府志採辛讜例增輯

宗欽字景若金城人父燮字文友呂光太常卿欽少而好學有  
儒者之風博綜羣言聲著河右仕沮渠蒙遜為中書郎世子洗  
馬上東宮侍臣箴曰恢恢元古悠悠生民五才迭用經敘彝倫  
匡父維子弼君伊臣顛而能扶屈而能申昔在上聖妙鑒厥趣  
不曰我明而乖其度不曰我新而忽其故如彼在泉臨深是懼

如彼覆車望途改步是以令問宣流英風遠布及於三季道喪  
純遷桀起瓊臺紂醜糟山周滅妖如羿喪以田險詖蔽其耳目  
鄭衛陳於其前怙才肆虐異端是纏豈伊害身厥肩殲焉茫茫  
禹迹畫為九區昆蟲鳥獸各有巢居雲歌唐后垂橫美虞疏網  
改祝殷道攸敷龍盤應德隋虵銜珠勿謂無心識命不殊勿謂  
理絕千載同符爰在子桓靈數攸臻儀形徐阮左右劉陳披文  
採友叩典問津用能重離襲曜魏鼎維新於昭儲后運應元籙  
夕惕乾乾虛衿遠屬外撫幽荒內懷焚獨猶懼思不逮遠明不  
遐燭君有諍臣庭立謗木本枝克昌永符天祿微臣作箴敢告  
在僕世祖平涼州入國賜爵卧樹男加鷹揚將軍拜著作郎欽

與高允書曰昔皇綱未振華裔殊風九服分隔金蘭莫遂希懷  
寄契延想積久天遂其願爰邁京師才非季札而眷深孫喬德  
乖程子而義均傾蓋曠齡罕遇會之一朝比公私理異訓諮路  
塞端拱蓬宇歎慨如何不量鄙拙貢詩數韻若夫泉江相忘之  
談遺言存意之美雖莊生之所尚非淺識所宜循愛敬既深情  
期往返思遲德音以祛鄙吝若能紆鳳彩以耀榛蒼迴連城以  
映瓦礫者是所望也詩曰崑崙恆嶺滉瀆滄溟山挺其和水耀  
其精啟茲令族應期誕生華冠衆彥緯邁羣英其一於穆吾子含  
貞藉茂如彼松竹陵霄擢秀味老思冲翫易體復戢翼九皋聲  
溢宇宙其二我皇龍興重離疊映剛德外彰柔明內鏡乾象奄氣

坤厚山競風無殊音俗無異徑三其經緯曰文著述曰史斟酌九

流錯綜幽旨帝用訓詁明發虛擬廣闢四門披延髦士四其爾應

其求翰飛東觀口吐瓊香手揮霄翰彈毫珠零落紙錦祭墳無

疑割典無滯泮五其山降則謙含柔為信林崇日漸明升斯進有

邈夫子兼茲四慎弱而難勝通而不峻六其南董邈矣史功不申

固傾佞竇雄穢美新遷以陵腐邕由卓泯時無逸勒路盈摧輪

七其尹佚謨周孔明述魯抑揚羣致憲章三五昂昂高生纂我遐

武勿謂古今建規易矩八其自昔索居沈淪西藩風馬既殊標榜

莫緣開通有運閭遇當年披衿暫面定交一言九其諮疑祕省訪

滯京都水鏡叔度洗吝田蘇望儀神婉即象心虛悟言禮樂採

研詩書其履霜悼遷撫節感變嗟我年邁迅踰激電進乏由賜  
退非回憲素髮掩玄枯顏落菴其文以會友友由知己詩以明  
言言以通理盱坎迷流覲良闈止伊介虬光四麟曲水其允答  
書曰頃因行李承足下高問延佇之勞為日久矣王途一啟得  
敘其懷欣於相遇情無有已足下兼愛為心每能存顧養之以  
風味惠之以德音執翫反覆銘於心抱吾少乏尋常之操長無  
老成之致憑賴賢聖以自克勉而來諭褒飾有過其分既承雅  
贈即應有答但唱高則難和理深則難訓所以留連日月以至  
於今今往詩一篇誠不足標明來旨且表以心幸恕其鄙滯領  
其至意詩曰湯湯流漢藹藹南都載稱多士載耀靈珠邈矣高

族世記丹圖啟基郢城振彩涼區一其吾生朗到誕發英風紹熙

前緒奕世克隆方圖備體淑德斯融望傾羣傷響駭華戎二其響

駭伊何金聲允著匡贊西藩拯厥時務肅志琴書恬心初素潛

思淵淳秀藻雲布三其上天降命祚鍾有代協耀紫宸與乾作配

仁邁春陽功隆覆載招延隱叟永貽大賚四其伊余櫟散才至庸

微遭緣幸會忝與樞機竊名華省廁足丹墀愧無螢燭少益天

暉五其明升非論信漸難兼體卑處下豈曰能謙進未弘道退失

淵潛既慙朱闕亦愧閭閻六其史珣稱達楊蔡致深負荷典策載

蹈於心四轍同軌覆車相尋敬承嘉誨永佩明箴七其遠思古賢

內循諸已仰謝丘明長揖南史遐武雖存高蹤難擬風興夕惕

豈獲恬止八其世之圯矣靈運未通風馬殊隔區域異封有懷西

望路險莫從王澤遠灑九服來同九其在昔平吳二陸稱寶今也

克涼吾生獨矯道映儒林義為羣表我思與之均於紵縞十其仁

乏田蘇量非叔度韓生屬降林宗仍顧千載曠遊邁茲一遇藻

詠風流鄙心已悟十一其年時迅邁物我俱逝任之斯通擁之則滯

結駟貽塵屢空亦傲兩間可守安有回賜十二其詩以言志志以表

丹慨然刎頸義已中殘雖曰不敏請事金蘭爾其勵之無忘歲

寒崔浩之誅也欽亦賜死欽在河西撰蒙遜記十卷弟舒字景

泰蒙遜庫部郎中與兄同歸魏賜爵句町男加威遠將軍名亞

於兄魏書本傳



案黃志採北史本傳改宗欽為宋欽蓋據司馬氏資治通鑑  
然通鑑先書宋欽見元嘉十五年後書宗欽見元嘉十七年則宋字乃傳  
寫之譌今仍從史

趙柔字元順金城人少以德行才學知名河右沮渠牧犍時為  
金部郎太武平涼州內徙京師歷著作郎河內太守甚著信惠  
柔嘗在路得人遺金珠一貫價值數百緡柔呼主還之後有人  
遺柔鐸數百枚柔與子善明鬻之市有人從柔買柔索絹二十  
疋有商人知其賤與三十疋善明欲取之柔曰與人交易一言  
便定豈可以利動心遂與之縉紳之流聞而敬服子默字冲魏書

作明武威太守北史本傳